

Manfred Zirkelbach

MaZi-Ned auszudenke

Es Seeleamt

Allerheiliche, Allerseele, Toedesonndich, es werd jetz e weng ruhicher ömm ons römm, die Hektik machd jetz e bisle Platz für e boor Gedanke, wies dann so noochhär weddergedd on wies vielleicht däre gedd, die nix mer do sinn.

Do honn ich doch für e boor Woche e Gschichdle do drü gehörd on die muess ich unbedingt wedder verzähl, wäll die mir so orich guet gefalle hadd.

Nooch üwer fuchzich Johr middenanner is dr Moo eines Doochs gschdorwe. Nöme sooch ich ned, damid sich kee Mensch ogeschbroche föhl muess. On wie des bei uns in die Rhüedörfer so üblich wor, senn dann in die erschde Trauerwoche drei sogenannde Seeleämter bei en Pforr bestellt worn. Däre Witfraa worn ower scheinbor die fönnef Mark für so e Amt dann doch e weng zu vill, hadd also kee Seeleämter bestellt. Dr Pforr hadd die guet Fraa hald dann nooch die Sonndichskerrich obgebasst (hat auf sie gewartet) on nooch die Seeleämter gefreechd.

„Och, Herr Pforr, ich hadd jo so en guete Moo, där is bestömmd gradwaachs nei en Himmel komme, do brauchds kee Seeleamt mehr“. „Und wenn er nicht in den Himmel gekommen ist?“ „No, wann här ned dinn is im Himmel on här is no nei die Höll komme, no dann, Herr Pforr, hadd des Seeleamt doch erschd rachd kenn Wert, odr?“ Aber gute Frau, es gibt doch auch noch das Fegfeuer“. Also wann här nei des Fegfeüer geschickd worn is, Herr Pforr, des gönn ich dem, e bisle gebrönnd, des schodd gor nix. On außerdem, mei Moo, där hoadd sei ganz Lawe lang gesschaffd on gewerrichd, hadd nie gejommerd, aach wann här sich ömmr e moal e Blessur gehold hadd. Nee, Herr Pforr, des Fegfeüer, des häld mei Moo ganz leichd aüs“.

Ned auszudenke